



Conradus apud Heluetios natus & educatus est. Is à pueris operam literis dedit, & Tiguri artium & linguarum fundamēta feliciter iecit. Postea quoq; Theologiæ magna diligentia incubuit, atq; adeò profecit, ut in agro Tigurino adhuc iuuenis Ecclesiæ minister constitueretur. quam quidem functionem is magna laude obiuit. Pari ratione quoq; Bruggis Bernēsis ditionis oppido scholæ præfectus, diligentissimus fuit atq; iuventutem sibi concreditam egregiè instituit. Cum autē Græcæ & Latinæ linguæ esset doctissimus, Cornuti siue Phuruuti commentarium de natura Deorum gentilium ex Græco in Latinam linguam conuertit, atq; Basileæ anno millesimo quingentesimo quadragésimo tertio ædidit. Transtulit etiam commentarios quosdam Græcos in S. Pauli Epistolas. præterea Laonici de origine & rebus gestis Turcarum libros decem Græcè scriptos. sermones etiam quosdam sacros composuit, atq; anno salutis millesimo quingentesimo quinquagesimo primo Tiguri publicauit. Itaque Conradus suis scriptis omnibus innotuit, ac etiamnum Bruggis apud Heluetios insignis habetur. Conrad, Lycostb, in compend, Biblioth,